



საქართველოს მეცნიერებათა ეროვნული აკადემია

ქართული ენციკლოპედიის ი. აბაშიძის სახელობის მთავარი სამეცნიერო რედაქცია

მიურათი აშილ შარლ ლუი ნაპოლეონი



ა. მიურათი

მიურათი აშილ შარლ ლუი ნაპოლეონი (2. I. 1847, ბორდენტაუნი, ნიუ-ჯერსი, აშშ, – 27. II. 1895, სოფ. ჭკადუაში, ახლანდ. ზუგდიდის მუნიციპალიტეტი), ფრანგი მენარმე. დაამთავრა საშხ. სასწავლებელი ლეიტენანტის წოდებით. მ. იყო ნაპოლეონ I-ის მარშლისა და სიძის, ნეაპოლის ყოფილი მეფის – იოაჰიმ მიურათის შვილიშვილი. 1868 დაქორწინდა სამეგრელოს მთავრის – დავით დადიანისა და ეკატერინე ჭავჭავაძის ქალიშვილ სალომეზე (იხ. დადიანი-მიურათი სალომე). სამხედრო კარიერა განაგრძო ალჟირში. წყვილს ჰყავდა სამი შვილი: ლუსიენ შარლ დავითი (1870–1913, დაიბადა ალჟირში), ნაპოლეონ ლუი აშილი (იხ. მიურათი ლუი ნაპოლეონ აშილი) და ანტუანეტა (ბებე) კატერინა (1879–1954). მ. საფრანგეთ-პრუსიის ომის (1870–71) დროს

იყო საფრანგეთის იმპერატორის, ნაპოლეონ III-ის ფლიგელ-ადიუტანტი და სედანის ბრძოლაში (1870) მასთან ერთად ტყვედ ჩავარდა. ნაპოლეონ III-ის გარდაცვალების (1873) შემდეგ მ. ოჯახთან ერთად საცხოვრებლად საქართველოში, სამეგრელოში გადავიდა, სადაც სოფლის მეურნეობას მიჰყო ხელი, გახსნა სკოლები და აფთიაქები, ააშენა გზები და ეხმარებოდა ღარიბებს. ზუგდიდის (სადაც ჰქონდა კანცელარია და ჰყავდა საქმეთა მმართველი – ინტენდანტი) გარდა ოჯახი ცხოვრობდა სალხინოსა და ჭკადუაშში. აქ ვრცელ ფართობზე გააშენა უცხოური (მეტწილად ფრანგული – კაბერნე და ფორტუგე) და ადგილობრივი (ოჯალეში) ვაზის ჯიშების ვენახები. ჭკადუაშში ღვინოს ინახავდნენ მიწისქვეშა სარდაფში, ხოლო სალხინოში – ორ მარანში. ჭკადუაშში ჰქონდათ ჩანებისა და კასრების (მუხის ტკეჩის) დამამზადებელი საბონდერო საამქრო, ღვინის დასამუშავებელი

წნეხები, დგუშები, კლერტსაცლულები, აგრეთვე სპირტსახდელი. ღვინის გამოხდის შემდეგ საკონიაკე სპირტს აძველებდნენ. ღვინის რეალიზაცია ხდებოდა ადგილობრივ ბაზარზე, ასევე იგზავნებოდა რუსეთსა და ევროპაში. ამ ღვინოებს საერთაშ. გამოფენებზე მედლები და სიგელები ჰქონდა მიღებული.

მ. გარდაიცვალა მოულოდნელად. დაკრძალეს ჭკადუაშის კათოლიკური ეკლესიის ეზოში, სადაც 1975 გაიხსნა მემორიალური დაფა.
